

Jossy M.Lacle

Cu prijs di un bari di petroleo na 110 dollar y di fuel oil na 70 dollar plus, na momento di redacta e articulo aki, un bishita na nos planta di procesa awa y di genera coriente WEB, ta na ordo. Ningun hende lo no discuti cu nos cu e planta di awa aki ta bon maneha. Pregunta ta, si e tempo a yega pa enberdad nos considera e posibilidadnan di energia alternativo na serio, mirando e prijs di fuel. E persona cu a pone e planta yega na su zenith awendia ta ingeniero Jossy Lacle (58) y ta e por duna nos un bista cla di e esfuerzonan den pasado; e situacion presente y su vision pa e futuro.

COMPARA CU NOS REGION NOS PRIJS TA COMPETITIVO

Jossy Lacle ta felizmente casa, tin dos yiu grandi caba y dos nieto. Ela bay school basico na Paradera den e tempo di frernan, y a sigui pa La Salle College. Ora cu ela caba e school, a tarda poco pa e ta riba un avion pa Hulanda. Aya el a studia 'werktuigbouwkunde' na Zwolle. Na Dordrecht el a sigui studia agregando 'economische bedrijfseconomie' na su conocimiento. E tempo ey ora bo caba bo estudio no tabatin mucho oportunidad pa scohe for di dje. **"Casi tur hende tabata bay traha na Lago. Mi a drenta na aña 1972. Ey mi a forma carera den diferente departamento. Na '84, mi a bira bira adviseur di gerencia y mi a keda den e funcion ey, tambe haciendo PR te na e ciere di e refineria na juni '85."** El a bolbe bay Hulanda y dia prome di september el a cuminsa na Exxon

chemicals na Rotterdam. Esaki a dura 5 aña mas na Hulanda, te cu el a bin tende mas y mas, di cambianan cu tabata sosode na Aruba. **"Mi a bin compronde cu e planta di awa tabata hiba perdida y cu gobierno kier a hacie un NV. Mi a solicita y a keda acepta y a cuminsa traha prome di September '90."**

CAMBIO

Tempo cu Jossy a yega na WEB emberdad e compania tabata hiba perdida y gobierno e tempo ey constantemente mester a hinca placa aden. E situacion di e empresa mes tabata deplorable, pa falta di inversion y mantencion. **"E personal tabata ambtenaar y ey mi a pick up e encargo. E tarea principal tabata pa hunto cu otro personanan, transforma WEB pa nos por a bay riba e mercado financiero pa renoba e planta**

HOPÍ NO TA COMPRONDE BRANDSTOFCLAUSULE NAN TA KERE CU TA COBRA DOBBEL

y **expande.**" A tuma basta tempo pa tur cos por a keda cla, pero na 1 jan 1992, formalmente WEB bira un NV. E empleadonan a retira como ambteenaar y a drenta servicio di WEB.

Corda cu esaki tabata e tempo-rada cu den pueblo, e palabranan di moda tabata 'ketels, boilers, split-tube', e protagonistanan di diferente 'blackout'. **"E tempo ey nos tabata importa awa for di Dominica y Venezuela. Despues di hopi renobacion, nos a prepara pa cumpra un planta y a cuminsa automatiza e systema. A tuma nos un paar di año, nos turismo tabata crece, nos poblacion tabata crece y nos mester a keda capta e demanda."**

A lanta un structura tipo 'Holding', yama Utilities NV, pa e entidad por a fia placa. Prome tarea di Utilities tabata cumpra Elmar y djey WEB, pa pone politiek 'op een afstand'. Ademá di esey Jossy ta corda, cu e tabata un exigencia di gobierno di Hulanda tambe cu a yuda cu e financiamiento. **"Na januari, e año aki, nos a cumpli 15 año como un NV. Satisfecho, pa a pone WEB caminda e ta awendia."**

Algo remarcabel ta cu aunke a redobla e produccion, e cantidad di trahador a keda mescos. A cuminsa e NV na año 1992 cu 268 trahador, awendia e cantidad no a subi mucho y tin 285 trahador. Mientras cu nan a haci e sistema mas automatiza, Jossy ta bisa cu nan ta sigui inverti den sigui entrena e trahadornan. **"Antes nos tabata lesa meter cu como 25 empleado, awendia nos ta na 13 pa 14 empleado. Corda cu e cantidad di cas a casi redobla; antes tabatin 22 mil cas, awendia tin 36 mil cas y awor nos ta hacie cu trahadornan motiva."**

BRANDSTOF CLAUSULE

Jossy Lacle ta bisa cu e ta probecha di cada oportunidad cu e haya pa splica e cuestion di 'brandstofclausule'. El a keda introduci na 1986, pero Jossy ta bisa cu semper e tabat'ey den un of

otro forma. **"E motibo cu a introducie ta pasobra, antes e prijs di petroleo tabata relativamente stabiel. Despues di tempo el a cuminsa subi y baha, gobierno a purba di absorb'e pa un tempo, pero despues mester a keda adapt'e. Den awa e ta hinca den e tariff y den coriente e ta separa. Hopi no ta compronde brandstofclausule, nan ta kere cu ta cobra dobbel. Tin mas gasto cu nos ta comparti. E reparticion di e brandstofclausule ta di 40% den produccion di awa y 60% den coriente."** Jossy no ta mira con lo por elimin'e, kizas si e ta bisa, den futuro lo por pensa un manera di reducir.

Durante e añanan a traha comicionnan pa mira con por baha e costo di awa, pero esaki a resulta di ta dificil. Lacle ta menciona cu nan a logra, año pasa di hisa e eficiencia di e planta cu 3%, pero na un otro banda e prijs di fuela oil a subi cu 100%. **"Naturalmente tin keho, pero compara cu nos region nos prijs ta competitivo. Tin pais ta purba subsidia e awa, pero ideanan asina no ta dura hopi, ya cu e prijs internacional ta sigui subi"**

ENERGIA ALTERNATIVO

Nos tin abundante di solo y biento, lo no ta logico pa nos haci uso di e recursonan natural ey? Jossy ta splica cu pasenshi. **"Logico si, practico...ainda no. E tecnologia t'ey, pero ainda ta demasiado excesivo financieramente pa implementa. Hopi pais Europeo of Mericano ta wordo subsidia door di gobierno of otro instancia cu ta haci e introduccion bira mas atractivo."** Jossy Lacle ta agrega cu nan no a sinta keto, nan ta buscando entre e diferente fondonan europeo, cu kizas lo por subsidia e gastonan cuantioso inicial. Ta berdad, e ta bisa, cu gobierno a duna nan un tereno na Vader Piet. **"Ban supone cu nos ta instala e tereno completo, asina mes energia alternativo lo produci e 6% di e demanda cu nos mester na Aruba. Con nos ta yega na e otro 94%? Nos ta**

limita na tereno y nos consumo local ta masha masha halto mes! E peak di nos isla ta di 125 Megawatt; un isla mane' Boneiro ta usa 10 Megawatt den su totalidad." Jossy ta menciona cu ta nos uso di aircó ta loke mas ta hala e demanda.

E ultimo biaha cu Aruba a conoce un blackout total tabata dia 22 november 2002 y esey ta algo cu ta yena Jossy y su personal na WEB cu orguyo. E ta bisa cu mester keda inverti den ekipo necesario, mantencion ta crucial y nan ta planea e proyectonan añanan delanta. **"Cada año nos ta mira e crecimiento y ta traha un forecast pa futuro. Nos ta cambia nos tecnologia pa nos hacie mas eficiente. 'Reverse Osmosis' ta den evaluacion di 6 luna pa un año, si e bay manera nos tine previsto nos lo busca mas pa e di dos fase."**

Lacle su management style, a bin ta cambia atraves di e añanan. E ta vocifera cu e estilo 'Exxon' tabata mucho mas autoritario y e ta pensa cu e tempo ey e tabata necesario. Awendia cambio den organisacion, un poco mas habri, hopi mas delegacion di trabou, a pone cu ta logra mes tanto, cu e confianza den su staff.

SINDICATO

Un topico delicado ta e sindicato SIWA. Nos ta puntra e ingeniero si e sindicato no ta pone cuchiu na garganta di e planta y di nos pais, ki ora cu nan kier un aumento, ya cu nan tin e poder di pone e isla plat den un rato. E no ta mir'e asina **"Den e añanan cu a pasa, nos a traha cu diferente sindicato un structura di salario bon hinca den otro. Antes nos mester a pasa den dje cada biaha, pasobra tabata falta e structura. Awendia bo por traha cu un plan pa termino largo; ami ta pensa cu nos trahadornan ta gana loke nan merece."** E ta lamenta masha e hecho cu a laga circula un lista di salario, e ta mira salario como algo hopi personal. Corda cu nos tin hende cu 35 pa 40 año trahando, ta

TIN PAIS TA PURBA SUBSIDIA E AWA PERO IDEANAN ASINA NO TA DURA HOPI

profesionalnan y ami ta orguyoso di nan. E ta pensa cu awendia no ta laga asuntonan di sindicato escala, sino ta trata nan na mesa delanta.

SYNERGIA

E hecho cu Prome Minister a menciona e posibilidad di pone e planta di WEB y Elmar hunto pa trece synergia y reduci gasto, ta algo cu nos tambe ta trece na mesa. "Lo mester haci un estudio pa mira e pro- y contran di uni e dos companianan. Corda cu atrabez di aña nos a bin ta trahando hunto como compania caba, precisamente pa reduci gasto. Pero atrobe ta un estudio profundo lo por determina e bentahanan y posibel desbentahanan."

Jossy ta bisa cu nan ta informa e minister encarga, den caso aki Prome Minister, kende ta haya informacion tambe via e board di Utilities NV. Parlamentarionan tin un comicion di energia cu ta haci bishita y ta haya informacion ora esaki ta rekeri.

WEB su ganashi ta di un 10 miyon florin pa aña average. "Naturalmente hopi hende ta kere cu 10 miyon ta masha placa, pero corda cu nos tin inversion di 400 miyon florin. Si nos baha bou di e ganashi ey nos compania no ta keda stabiel."


FUTURO

Tin un rapport traha cu ta purba mira te na aña 2025. Den e rapport aki a bin sugerencianan caba cu a hiba na cambio den algun systema di WEB manera e systema 'reverse osmosis'.

"E base di e estudio tabata pa mira con ta produci e energia cu e gasto di mas abou. A studia energia alternativo tambe, keremi si e estudio muestra cu ta esey ta e manera di mas barata pa produci energia, nos lo a implemente caba."

Otro topico cu nos ta tende politiconan papia di dje ta un fondo pa hende di menos recurso. "Ta otro idea cu tin cu haci un estudio pa mira kico ta posibel, pero WEB sigur no por determina ta ken ta di menos recurso. Na Corsow a bin cu un fondo pa e brandstof clause pero tur cos ta depende con e prijs di petroleo subi, pues e no a bay bon." Nos a puntra Jossy Lacle dicon nan no ta mas activo riba e 'servicio na comunidad' y el a sigura nos cu nan ta activo, pero cu nan a scohe pa no haci relacionnan publico cun'e. E ta bisa cu tin discusion si mester haci nan trabounan conoci, pero e ta kere cu ta e trabou mester ser haci di curazon pa e organisacionnan cu mester, esey ta importante.

Otro aña na October 2009, Jossy Lacle ta contempla retiro. "Mi no ta pensa mucho riba e dia ey. E accionista y Utilities lo tin cu pensa den un sucesor. Pa loke ta ami mes, otro aña mi ta cumpli 17 anja na WEB, y dia cu mi cumpli 60... mi ta kere ta suficiente. Mi ta sigur cu na e edad ey, lo tin hopi cos interesante pa sigui haci." Su sucesor lo drenta un tempo di cambianan na unda cada dia energia alternativo lo bira mas importante y WEB a tira bista caba te 2025. **F**



ENERGIA ALTERNATIVO
LO PRODUCI E 6% DI E
DEMANDA CU NOS
MESTER NA ARUBA.
CON NOS TA YEGA
NA E OTRO 94%?